



REPUBLIKA E SHQIPËRISË  
ENTI RREGULLATOR I ENERGJISË

Bordi  
VENDIM

Nr. 215, datë 20.12.2019

MBI

**RISHIKIMIN E RREGULLORES PËR PROCEDURAT DHE AFATET PËR DHËNIEN,  
MODIFIKIMIN, TRANSFERIMIN, RINOVIMIN OSE HEQJEN E LICENCAVE NË  
SEKTORIN E ENERGJISË ELEKTRIKE**

Në mbështetje të neneve 16 dhe 39 të Ligjit nr. 43/2015 “Për Sektorin e Energjisë Elektrike” i ndryshuar, nenit 15 dhe nenit 26 të “Rregullave të organizimit, funksionimit dhe procedurave të ERE-s”, miratuar me Vendimin e bordit të ERE nr. 96, datë 17.06.2016, si dhe nenit 21 të “Rregullores për procedurat dhe afatet për dhënie, modifikimin, transferimin, rinovimin ose heqjen e licensave në sektorin e energjisë elektrike”, bordi i ERE-s në mbledhjen e tij të datës 20.12.2019, mbasi shqyrtoi relacionet e hartuara nga Drejtoritë Teknike me Nr. 79/6 Prot , datë 23.08.2019 dhe nr 119/4 prot, datë 18.12.2019, në lidhje me rishikimin e “Rregullores për procedurat dhe afatet për dhënie, modifikimin, transferimin, rinovimin ose heqjen e licensave në sektorin e Energjisë Elektrike”,

**Konstatoi se:**

- Bordi i ERE me vendimin nr. 239, datë 02.11.2018, filloi procedurën për rishikimin e “Rregullores për procedurat dhe afatet për dhënie, modifikimin, transferimin, rinovimin ose heqjen e licensave në sektorin e energjisë elektrike”, miratuar me vendimin e Bordit të ERE-s nr. 109, datë 29.06.2016.
- ERE me njoftimin nr. 55/66 Prot., datë 02.11.2018, ka publikuar në median e shkruar fillimin e kësaj procedure.
- Me shkresën nr. 706 Prot., datë 06.11.2018, i është drejtuar palëve të interesit: MIE, A.K, Komitetit Kombëtar të Digave të Mëdha (KKDM), KESH sh.a, OST sh.a, OSHEE sh.a, AAES, FIAA, AREA, ACERC dhe Shoqatës së Prodhuesve të Vegjel për marrje mendimi rreth ndryshimeve të propozuara.
- Po ashtu me emailin e datës 12.11.2018, ERE i është drejtuar Sekretariatit të Komunitetit të Energjisë për marrje mendimi për ndryshimet e propozuara.
- Në përfundim të afatit të pritjes së komenteve nga palët rezulton se OST sh.a me shkresën e protokolluar në ERE me nr. 706/1, datë 21.11.2018; OSHEE sh.a me shkresën e protokolluar në ERE me nr. 706/2, datë 23.11.2018; Sekretariati i Komuniteti të Energjisë

me emailin e datës 30.11.2018; MIE me shkresën e protokoluar në ERE me nr. 706/4, datë 03.12.2018 dhe Komiteti i Digave të Mëdha me shkresën e protokolluar në ERE me nr. 706/5, datë 03.12.2018, kanë dërguar në ERE opinionet e tyre, si më poshtë, të cilat u morën kryesisht në konsideratë dhe u reflektuan në rregullore.

- ERE i'u drejtua palëve të interesit MIE, AK, KESH sh.a, OST sh.a, OSHEE sh.a, KKDM, FIAA, AREA dhe AAES, duke zhvilluar disa seanca dëgjimore për të diskutuar në lidhje me propozimet e palëve për ndryshimet në *“Rregulloren për procedurat dhe afatet për dhënien, modifikimin, transferimin, rinovimin ose heqjen e licensave në sektorin e energjisë elektrike.”*
- Në këtë seancë morën pjesë përfaqësues nga AREA, ENERGI ASHTA, AAES, KESH sh.a, OST sh.a dhe AK.
- Palët u shprehën në seancë se nuk kanë komente për propozimet e gjithësecilit prezent në seancë.
- Ndryshimet e propozuara në këtë rregullore vijnë kryesisht si rezultat i ndryshimeve që pësoi Ligji nr. 43/2015, *“Për sektorin e energjisë elektrike”* me atë nr. 7/2018 *“Për disa ndryshime dhe shtesa në ligjin nr. 43/2015, “Për sektorin e energjisë elektrike”*, sa i përket veprimtarisë së Operatorit të Tregut si dhe çeljes së Tregut të Organizuar të Energjisë (Bursës Shqiptare të energjisë). Për këtë arsye lindi nevoja e reflektimit të këtyre ndryshimeve në përmbajtjen e *“Rregullores për procedurat dhe afatet për dhënien, modifikimin, transferimin, rinovimin ose heqjen e licensave në sektorin e energjisë elektrike”*.
- Po ashtu në këtë Rregullore janë përfshirë edhe parashikimet e pikës 8 të VKM nr. 519, datë 13.7.2016, *“Për miratimin e modelit të tregut të energjisë elektrike”* i ndryshuar,
- Gjatë zbatimit të kësaj rregulloreje në punën e përditshme të Sektorit të Licencimit janë konstatuar mangësi të cilat bënë të nevojshëm rishikimin e saj në kuadër të përmirësimit të disa termave, kushteve apo afateve që kjo rregullore përcakton si dhe përshtatjen e saj me parashikimet që solli Ligji 7/2018 *“Për disa ndryshime dhe shtesa në ligjin nr. 43/2015, “Për sektorin e energjisë elektrike”*.
- Për propozimin e MIE në lidhje me *dhënien e licensave të prodhimit vetëm pas kryerjes së procedurave për marrjen në shfrytëzim të objektit*, palët prezente shprehën mosdakortësinë e tyre duke deklaruar se ky propozim ishte absurd dhe përbënte pengesë për investitorët. Ata gjykuan se nuk duhet të merret në konsideratë nga ana e ERE-s gjatë miratimit të ndryshimeve.

Ndryshimet e propozuara në këtë rregullore bëhen në kuadër të përmirësimit të saj, duke marrë në konsideratë komentet e palëve të interesit dhe saktësimet apo plotësimet e kryera nga vetë ERE në zbatim të parashikimeve të legjislacionit në fuqi.

Për gjithë sa më sipër cituar, Bordi i ERE-s,

**Vendosi:**

1. Të miratojë rishikimin e “Rregullores për procedurat dhe afatet për dhënien, modifikimin, transferimin, rinovimin ose heqjen e licensave në sektorin e energjisë elektrike”, miratuar me vendimin nr. 109, datë 29.06.2016, me shtesat dhe ndryshimet si më poshtë :
  - Kudo në rregullore do të zëvendësohet termi “aktivitet” me atë “veprimtari”.
  - Kudo në rregullore pas fjalëve, “Ligjit Nr 43/2015 “Per Sektorin e Energjise Elektrike” , do të shtohet fjala “i ndryshuar”.
  - Kudo në rregullore fjala “subjekt” zëvendësohet me fjalën “shoqëri”.
  - Kudo në rregullore do të zëvendësohet termi “fuqi e instaluar” me “kapacitet i instaluar”.
  - **Në nenin 4, pas pikës 2 shtohet pika 3 si më poshtë:**

*Për aq sa e lejon legjislacioni në fuqi i Republikës së Shqipërisë, nuk do të kërkohet aplikimi për licencim për tregtimin e energjisë elektrike ose furnizimin me energji elektrike në rast se një shoqëri ka një licencë të lëshuar nga një autoritet rregullator i një vendi tjetër Palë Kontraktore e Komunitetit të Energjisë / një shteti Anëtar të Bashkimit Europian, ose një vend tjetër me të cilin është nënshkruar një marrëveshje dypalëshe, për njohjen reciproke të licensave ndërmjet ERE-s dhe autoritetit përkatës rregullator, si dhe me kusht që ato të dorëzojnë në ERE licencën e përkthyer dhe noterizuar si dhe informacionin e përcaktuar në nenin 9 (1) dhe 9 (2), gërma “c”, të këtyre rregullave.*
  - **Në nenin 4, pika 3 ekzistuese bëhet pika 4, me përmbajtje :**

*Në rast se rregullatori vendos të njohë ushtrimin e veprimtarisë së tregtimit dhe furnizimit të energjise elektrike, shoqëria që do të ushtrojë këto veprimtari do të konsiderohet si e licencuar në mbështetje me legjislacionin në fuqi dhe i nënshtrohet të gjitha detyrimeve dhe të drejtave të të licencuarve nga ERE.*
  - **Në nenin 4, shtohet pika 5 dhe 6 me përmbajtje:**

*ERE do ti përgjigjet kërkesës për njohje licence me miratim ose jo brenda 30 ditëve pune.*
  - **Në nenin 4, shtohet pika 6 me përmbajtje:**

*Tregtarët dhe Furnizuesit e huaj të cilëve do t’u njihet licenca nga ERE, do të regjistrohen në një seksion të veçantë të Regjistrit të Licencave të parashikuar në nenin 19 të kësaj rregulloreje.*
  - **Në nenin 5 shtohet pika 2. me përmbajtje:**

*Për aplikimet në veprimtarinë e prodhimit të energjisë elektrike, të cilat paraqiten në ERE më vonë se data efektive e kontratës/autorizimit, llogaritja e afatit të licencimit, bëhet për periudhen e mbetur. Ky rregull vlen edhe për rastet e modifikimit të licensave.*
  - **Në Nenin 7 “Delegimi i të drejtave të aplikuesit”, pika 2 ndryshon :**

*Përfaqësuesi ligjor do të paraqesë ne ERE:*

    - a. *Prokuren ose autorizimin e aplikuesit per perfaqesimin e tij.*
    - b. *Vërtetim që përfaqësuesi dhe i përfaqësuarit nuk janë të përfshirë në një proces të filluar nga organet e drejtësisë (vërtetim nga prokuroria dhe gjykata).*
  - **Në nenin 7, në pikën 3: togfjalëshi “të deleguarit përgjegjës” zëvendësohet me fjalën “e përfaqësuesit ligjor”**

- **Në nenin 8, “Paraqitja e aplikimit”, pika 3 ndryshon :**  
*Dokumentacioni i paraqitur nga aplikuesi duhet të jetë në gjuhën shqipe, origjinal ose fotokopje e noterizuar dhe një kopje elektronike në CD, USB ose e – mail në adresën zyrtare të ERE-s, ndërsa vërtetimet dhe deklaratat nga organe e tjera duhet të jenë lëshuar jo më parë se 1 muaj nga momenti i paraqitjes së aplikimit.*
- **Në nenin 8, pika 5 ndryshon :**  
*“5. Dokumentacioni teknik sipas tipit të licencës duhet të jetë i hartuar dhe sigluar nga individ apo person juridik i pajisur me licencë profesionale përkatëse sipas legjislacionit në fuqi (ing. elektrike, ing. ndërtimi, ing. mekanike, ekspertë kontabël, ing. hidroteknikë etj).*
- **Neni 8, pika 6 shfuqizohet:**
- **Në nenin 8, pika 7 merr numërtimin 6**
- **Në tabelën e nenit 9, pika 1, gërma “a” “Të dhëna për aplikimin” (të plotësohen nga aplikuesi), shtohet opsioni i zgjedhjes “Njohje Licence”,**
- **Në tabelën e nenit 9, pika 1, gërma “b” “Të dhëna identifikuese të aplikuesit” (të plotësohen nga aplikuesi), në pikën 4 zëvendësohet togfjalëshi “I deleguari përgjegjës” me fjalën “Përfaqësuesi ligjor”.**
- **Në tabelën e nenit 9, pika 1, gërma “c” “Të dhëna për aplikuesin (të plotësohen nga aplikuesi)” në pikën 1 zëvendësohet togfjalëshi “aplikuesit nuk i është refuzuar ” me togfjalëshin “nuk më është refuzuar”**
- **Në tabelën e nenit 9, pika 1, gërma “c” , shtohet pika 4 me përmbajtje: “Deklaratë për kryerjen e pagesës së aplikimit/njohjes për licencim sipas llojit të veprimtarisë.”**
- **Në nenin 9 pika 2 “Dokumentacioni Juridik, Administrativ dhe Pronësor” gërma “b” ndryshon:**  
*Statuti (nëse është hartuar si dokument i ndryshëm/ i veçantë nga akti i themelimit)”*
- **Në nenin 9 pika 2, “Dokumentacioni Juridik, Administrativ dhe Pronësor”, gërma “d” ndryshon :**  
*Vërtetim që shoqëria dhe drejtuesit kryesorë të saj në rastin e personave juridikë, nuk janë të përfshirë në një proces penal të filluar nga organet e drejtësisë (vërtetim nga prokuroria dhe gjykata).”*
- **Në nenin 9, pika 2, “Dokumentacioni Juridik, Administrativ dhe Pronësor”, gërma “e” ndryshon :**  
*Struktura e ndërtimit dhe funksionimit administrativ të shoqërisë, sipas pozicioneve dhe profileve përkatëse. Në rastin e aplikimeve për licence prodhimi të energjisë elektrike kerkohet paraqitja e licences për drejtues teknik elektrik.*
- **Në nenin 9 pika 2 “Dokumentacioni Juridik, Administrativ dhe Pronësor” gërma “f” ndryshon :**  
*Marrëveshje Konkensionit apo çdo formë tjetër e marrëveshjes në rastet e aplikueshme të lidhur me institucionet përgjegjëse të ngarkuara me ligj, në përputhje me kuadrin ligjor përkatës si dhe ndryshim të këtyre akteve.”*
- **Në nenin 9, pika 3, “Dokumentacioni Financiar dhe Fiskal” gërma “d” ndryshon :**

*“Vërtetim për kryerjen e pagesës së rregjistrimit për aplikim dhe kërkesë për njohje, në llogari të ERE.-s, sipas Aneksit A të kësaj rregullore.”*

- **Në nenin 9, pika 4.1.3, “Dokumentacioni teknik dhe Grafik”, gërma “d”** ndryshon :  
*“Një hartë topografike ku të paraqitet gjurma e linjës transmetuese të energjisë elektrike në shkallë 1: 25000.”*
- **Në nenin 9, pika 4.1.4, “Dokumentacioni tekniko ekonomik” gërma “c”:**  
**Ishte:** *“Oponencen teknike e projektit”*  
**Bëhet:** *“ Oponencen teknike të projektit nga AKBN”*
- **Në nenin 9, pika 4.1.4, “Dokumentacioni tekniko ekonomik” gërma “d”** ndryshon :  
*“d. Miratimi i projektit të Digës nga Komiteti Kombëtar i Digave (në rastet e objekteve me dige)”;*
- **Në nenin 9, pika 4.1.4, gërma “d”, bëhet gërma “e”**
- **Në nenin 9, pika 4.1.4, gërma “e” bëhet gërma “f”.**
- **Në nenin 9, pika 4.1.5 “Lejet nga institucione të tjera”, gërma “b”** ndryshon:  
*Leja e shfrytëzimit të ujit për prodhimin e energjisë elektrike”.*
- **Në nenin 9, pika 4.2 titulli** ndryshon :  
*“Dokumentacioni teknik për Termocentralin (TEC)”*
- **Në nenin 9, pika 4.2.5 “Lejet nga institucionet e tjera”, gërma “b”** ndryshon :  
*b. Leja e shfrytëzimit të ujit.”*
- **Në nenin 9, pika 4.3, titulli** ndryshon :  
*“Dokumentacioni teknik të centraleve për prodhimin e energjisë elektrike nga era”.*
- **Në nenin 9 pika 4.3.1 nëntitulli,** ndryshon :  
*“Të dhena teknike të centraleve për prodhimin e energjisë elektrike nga era.”*
  - **Në nenin 9, pika 4.4 titulli** ndryshon  
*Dokumentacioni teknik i centraleve për prodhimin e energjisë elektrike nga dielli (Fotovoltaike);*
  - **Në nenin 9, pika “4.4.1 nëntitulli** ndryshon :  
*Te dhena teknike të centraleve për prodhimin e energjisë elektrike nga dielli “Fotovoltaike” (te plotesohen nga aplikuesi)”*
  - **Po këtu në tabelën e pikës 4.4.1 hiqet përcaktimi i tipi të panelit “Solar Termik”,**
- **Në nenin 9, pika 4.4.4, gërma “c”** ndryshon :  
*Oponencen teknike të projektit e kryer nga AKBN ose nga një person fizik apo juridik i licencuar.”*
  - **Në nenin 9 pika 4.7 Dokumentacioni teknik për veprimtarinë e furnizimit të energjisë elektrike”, gërma “b”** ndryshon:  
*Kapitali financiar (i shprehur në vlera monetare) i parashikuar për ushtrimin e kësaj veprimtarie, i shoqëruar me vërtetim nga banka apo institucione të tjera tjera financiare të njohura me ligj.”*
  - **Në nenin 9 pika 4.7 Dokumentacioni teknik për veprimtarinë e furnizimit të energjisë elektrike”, gërma “c”** ndryshon:

*Lista e kontratave aktuale dhe të mëparshme (nëse ka), për blerjen dhe sigurimin e energjisë elektrike;*

- **Në nenin 9 pika 4.7 Dokumentacioni teknik për veprimtarinë e furnizimit të energjisë elektrike**, gërma “e” ndryshon :  
*Sistemin IT të krijuar për veprimtarinë e furnizimit të energjisë elektrike apo marrëveshje me të tretët për vënien në dispozicion/përdorimin e këtij shërbimi.”*
- **Në nenin 9 pika 4.5 gërma “h”, pika 4.6 gërma “f”, 4.7 gërma “f” dhe 4.9 gërma “c”**ndryshon :  
*Lista e anetareve te Keshillit Mbikqyres. (kur forma e organizimit të shoqërisë e përmban një të tillë)”.*
- **Në nenin 9 pika 4.7 pas gërmës “f”, shtohet gërma “g” me përmbajtje si vijon:**  
*“Dokumentacion që vërteton aftësinë e disponimit të zyrave përfaqësuese të furnizuesit, për shërbimet që do ti ofrohen klientëve.*
- **Në nenin 9 pika 4.7 Tabela a. “Te dhena per klientet dhe energjine e furnizuar”,** merr gërmëzimin “h”
- **Në nenin 9 pika 4.7 gërma b pas tabelës a.** “Te dhena per klientet dhe energjine e furnizuar”bëhet gërma “i”
- **Në nenin 9 pika 4.7 gërma c pas tabela a. “Te dhena per klientet dhe energjine e furnizuar”**shfuqizohet.
- **Në nenin 9 pika 4.8, “Dokumentacioni teknik për veprimtarinë e tregtimit të energjisë elektrike”** gërma “b” ndryshon :  
*“Kapitali financiar (i shprehur në vlera monetare) i parashikuar për ushtrimin e kësaj veprimtarie, i shoqëruar me vertetim nga banka apo institucione te tjera financiare te njohura me ligj.”*
- **Në nenin 9, pika 4.9, Dokumentacioni teknik – ekonomik për veprimtarinë e Operimit të Tregut të energjisë elektrike, ndryshon :**  
*Dokumentacioni teknik për veprimtarinë e Operimit të Tregut të energjisë elektrike.*
  - a. *Dëshmi për krijimin, formën ligjore të subjektit që do të kryejë veprimtarinë e Operimit të Tregut sipas legjislacionit në fuqi për këtë qëllim.*
  - b. *Lista e të punësuarve, profesioni;*
  - c. *Dëshmi për zotërimin e harduerit dhe softuerit të nevojshëm për operimin e tregut sipas Rregullave të Tregut Shqiptar të energjisë elektrike dhe akteve të tjera për këtë qëllim.*
  - d. *Lista e anetareve të Këshillit Mbikëqyrës. (kur forma e organizimit të shoqërisë e përmban një të tillë).*
  - e. *Dëshmi që vërteton mundësinë për të zhvilluar te gjitha procedurat operacionale, kontraktuale ose marrëdhëniet e aksesit, përfshire shërbimet per likuidimet (cleaning) dhe rregullat qe lidhen me keto, mekanizmin per mbikqyrjen e tregut, procedurat dhe kontrollet per mbrojtjen e informacionit konfidencial.*



f. Dëshmi për kapitalin financiar fillestar të rregjistrimit të Operatorit të Tregut sipas pikës 2 të VKM Nr.322, datë 15.05.2019 “Për krijimin dhe përcaktimin e formës ligjore dhe të strukturës së pronësisë së kapitalit të Operatorit të Tregut”  
g. Çdo dokumentacion tjetër që ka të bëjë me bashkëpunimin në kuadër të veprimtarisë së operimit të tregut të energjisë elektrike.

Në nenin 12 pika 1, në fund të paragrafit shtohen fjalët: “*apo legjislacionit në fuqi.*”

- Në nenin 12 pika 2, zëvendësohet fjala “*raport*” me fjalën “*relacion*”.
- Në nenin 13 pika 2, gërma “*k*”, zëvendësohet “*Rep.*” me “*Republika*”.
- Në nenin 13 pika 3 gërma “*c*”, zëvendësohet fjala “*Drejtoritë*” me fjalën “*Drejtoria*”.
- Në nenin 14, “Pranimi ose Refuzimi per Licensim i Aplikuesit” në pikën 1 pas fjalës “*prodhimit*” shtohen fjalët “*të energjisë elektrike*”.
- Në nenin 15 “Modifikimi i Licencës, në pikën 2, saktësohet lidhëza “*më*” me “*MW*”.
- Në nenin 15, “Modifikimi i Licencës”, Pika 4, gërma “*e*” ndryshon:  
“*Të ketë kryer pagesat e aplikimit dhe të rregullimit në ERE.*”
- Në nenin 16, “Rinovimi i Licencës”, pika 7 ndryshon ;  
“*Të ketë kryer pagesen e aplikimit dhe atë të rregullimit në ERE.*”
- Në nenin 17, “Transferimi i plotë dhe i pjesshëm i licencës” pika 4, shtohet gërma “*d*” me përmbajtje:  
“*d. Vërtetimin e pagesës së aplikimit*”.
- Në nenin 17, “Transferimi i plotë dhe i pjesshëm i licencës” pika 4, shtohet gërma “*e*” me përmbajtje: “*e. Vendimin e organeve drejtuese të shoqërisë për miratimin e transferimit të licencës së shoqërisë.*”
- Neni 18 “Heqja e Licencave”, ndryshon :  
*Me iniciativë të ERE, dhe mbajtësit të licencës apo të autorizuarit në kuptim të nenit 4 pika 4 të kësaj rregulloreje, ERE fillon procedurën për heqjen e licensës në zbatim të parashikimeve të rregullores për procedurat e heqjes së një licence të miratuar nga Bordi i ERE-s.*
- Neni 19, pika 4, gërma “*h*” ndryshon :  
*Vendimi i ERE-s.*”
- Neni 20 “E Drejta për t’u Informuar mbi Përmbajtjen e Rregjistrimit”, pika 1, ndryshon:  
*Rregjistri i Licencave publikohet në faqen e internetit të ERE.*”
- Neni 22 ndryshon titulli “*Amendimi i Rregullores*”
- Në Aneskin A “Pagesa e regjistrimit dhe procedimit të një aplikimi”, shtohet në kollonën e fundit të tabelës zëri “*Njohja e Licencës*”, për të cilën pagesa e aplikimit është llogaritur në masën 500 000 lekë.

2. Drejtoria e Çështjeve Ligjore të njoftojë të interesuarit për Vendimin e Bordit të ERE-s.

Ky vendim hyn nga data 01.01.2020

Për këtë vendim mund të kërkohet rishikim brenda 7 ditëve kalendarike si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETARI**

**Petrit AHMETI**

[https://ere.gov.al/doc/RREGULLORE\\_E\\_LICENSIMIT\\_DATE\\_14\\_01\\_2020.pdf](https://ere.gov.al/doc/RREGULLORE_E_LICENSIMIT_DATE_14_01_2020.pdf)